

福建通志

第壹百冊

道士傳
列仙傳
滑稽傳
伶官傳
宦者傳

K295.7

1

福建道士傳卷一

道之與仙不能無分別者仙本渺茫之事無書藝經書焉其有飛昇尸解諸明文者列入仙若隱形坐化之類或出邪術或不過正幾仍歸道士也

唐

張標閩處士有道術能通冥府每三五日輒臥如死而體僵不冷既蘇多說冥事王保宜爲閩帥持章赴朝廷道路梗塞泛海溺死其孫侃留閩因家人疾延標禱冥府標曰見君之先人司職水府因言其家事委曲皆中人以爲神

道光通志

符契元福州人上都吳天觀道士也長慶初德行法術爲時所重云

閩書

五代

陳守元閩縣人爲道士以左道見信於閩王王延鈞延鈞作寶皇宮居之守元假寶皇命恣思延鈞僭號和繼立尊守元爲天師愈信重之凡更易

將相刑罰選舉多與之議守元受賂請託靡所不至方益肆祀作三清殿於禁中以黃金數千斤鑄寶皇及無始天尊老君像晝夜作樂焚香禱祝政無大小皆傳寶皇命決之一國若狂連重遇之亂守元易服將逃爲亂兵殺死宮中

十國春秋

譚紫霄泉州人幼爲道士初有道士陳守元者闢地得白札數十貯銅盎中皆漢張道陵符篆朱墨如新不能用以授紫霄盡能通之紫霄遂自言得道陵天心正法効鬼魅治疾病多效閩王王昶尊事之號金門羽客正一先生闕亡遁居廬山棲隱洞學者百餘人武昌節度使何敬洙嘗殺女奴投尸井中人無知者遇疾召紫霄中夜被髮仗劍考治見女厲自訴詰旦屏人以語敬洙乃丹篆符遣之疾良已廬山僧於溪澗創亭有大石堅不可鑿紫霄往視曰此固易爾索杯水喫之命工施鑊應手如粉南唐後主聞其名召見賜官階以紫金比諸蜀之杜光庭固辭不受金陵旣下紫霄無疾卒年百餘歲葬之日有祥雲白鶴繞送之後言天心法者祖紫霄

陸游南
唐書

李良佐字元輔南唐元宗景之弟也性冲淡保大八年辭景訪道人武夷
遂居焉舊觀在洲渚間景勅有司移剏今址賜額會仙冊封演道冲和先
生又鑄鐘重千餘仞自金陵航海至閩良佐居武夷三十七載坐化於觀
之清虛堂其弟元真適至藏蛻於觀後今武夷祀之以爲開山之祖武夷志
吳翁建寧人善卜閩太傅章氏愛將有張陳者後奔南唐南唐主命查文
徽征閩副以二將屯軍於五夫里二將召翁占之曰吉未幾王延政降二
將同文徽歸復次五夫召翁與語資遺甚厚翁辭焉二將曰吾欲棄人間
事與翁爲林泉交可乎翁乃爲築室山中今大將村小將村馬戰山鼓亭
皆其遺迹也二將從翁學長生久之得道年皆百餘雍正通志

宋

吳崇岳泉州龍興觀道士辟穀多年而有神異漕使周渭贈以詩太平興

國中詔入京

郡閣雅談

王中正舊名提長汀人咸平中遇羽士授以鉛汞黃金之術且戒曰非遇萬乘勿輕出挾其術走上饒佯狂呼呌坐流嶺南復遇羽士謂之曰姑俟他日遂逃至京師爲有司所捕供奉官張德權異之以聞上命皇城司劉承珪問狀中正面奏改今名賜對龍圖閣下具陳靈異獻所爲白金遂特授許州參軍祥符間每遇大典禮大工役率爲金以進景靈宮成進黃金四千九百兩白金萬有二千七百四十兩前後金累鉅萬詔書褒諭累官光祿大夫簡較禮部尙書右神武衛大將軍後卒於京命內侍周懷正護喪事塑像景靈宮書問

廖藏將樂人累試不第周遊四方遇異人得養生要訣名聞於朝真宗召見賜茶話逾時藏進詩謝尋歸祀先塋辭姻舊去莫知所往書問

楊萬大崇安人好恬靜結茅武夷山漁樵山水夜則懸燈獨坐詩琴自隨一夕有道士叩門求宿萬大禮之久而益勤一日復來曰吾非世人也當歸洞天命舟欲與偕去萬大蹙然曰如二親未葬何道士曰侍襄大事與

汝偕往因共舟至甌之豐樂里指漢灣秀峯曰汝某年月日奉親柩於此
白狸眠處卽葬地也白狸起候卽葬時也萬大果從其言葬焉宋祥符四
年事也夢前道士來迎曰今汝家事畢當俱去矣覺卽沐浴更衣而逝年
九十七或云楊榮卽萬大之後也舊志

邱允一作元廸漳州人咸平庚子爲道士居本州天慶觀常遍遊名山祥符

閒授錄於龍虎山得道術能役鬼神慶曆丙戌賜蘭袍至和甲午賜號冲

元大師治平甲辰自知卒日沐浴衣冠不疾而化閩書

吳本產於清礁今海地世所稱吳真君者也少超悟長得道術不茹葷不授

室業醫活人按病與藥如矢破的或吸氣噓水以飲病者雖沈痼奇怪叵

曉之狀亦就瘥愈於是病人交午於門無貴賤悉爲視療景祐六年蛻化

於同安之白礁鄉人肖像祀之案同安志云吳真人名本由貢舉授御史

於漳州白礁乘鶴昇天此全與閩書所載互異閩書不言本官御史亦無
醫仁宗后事惟記明永樂中文皇后患乳夢道人獻方牽紅絲纏乳上灸
之后乳頓瘥問其居對在某所明日遣使訪之云有道人自言福建泉州
白礁人姓吳名本昨出試藥今未還也既不得道人所在遂入閩求而知

之皇后驚異勅封吳天醫靈妙惠真君保生大帝仍賜龍袍一襲閩書海澄縣青礁條又云吳真人本所產地也二礁相對其西曰白礁屬同安其東曰青礁屬海澄白礁有吳真人廟曰西宮青礁亦水旱疾疫款謁如響有廟曰東宮據此吳本產青礁而蛻化於白礁明矣部使者以廟額請賜名慈濟開禧三年草寇騷擾境上忽覩旗幟懼不敢入聞事封英惠侯後累封普祐真君道光舊志

洪氏女名聖保居莆田將軍巖修真十餘載年五十於惠安龍泉出家布衣一食或絕粒逾年皇祐末鄉人夜聞音樂聲晨興潔髮更衣而逝道光舊志

韋道人不知何許人熙寧間往來邵武市中或寓寺觀初徐熙春市酒邑西門外有井道人每乞酒於婢婢與之道人無日不來熙春知之搥婢傷道人以百傷丸餌婢立愈併教之製方與水傾入井中再製即取此水可療百病後服之多驗因名其井曰仙源井熙春後亦得道道光舊志

林守真自言永嘉人少爲奉化水軍有所悟削籍而歸熙寧中結庵長溪縣歛溪上衣敝裘寒暑不易或與新者付酒家不屑也一日設純陽會道流至者九十三人守真旅進旅退不出一語丙夜瞿然而作於廣廷中三

拜復位語隣坐曰吾當先行跌坐瞑目而逝探懷中有遺札曰得行便行
得去便去明月清風爲伴侶翼日有鶴舞庭中

道光舊志

謝祐沙縣人移居歷山嘗從黃裳學元豐五年從裳守泉州裳遣往建甯
遇異人於水晶宮留憩三日授以金符玉冊歸遂體骨不凡復師事薩真
人遂精道術元祐二年化去鄉人祀之有禱輒應紹興九年勅封顯烈尊

王淳熙十六年賜額正順

閩書

曹四公元祐閒寧洋人生時香霧濛山三晝夜不散因名其地爲香寮山
鄉有神每歲以童男女祀里人患之四公往詣廬山學禦妖術歸人聞空
中金戈鐵馬聲神懼求活許其棲水尾潭後不爲厲紹聖閒大疫四公以
劍刺石液湧如水飲者立愈會洪水漂民田四公於壩上立壇令人以柳
枝矢射水中少頃一巨蟒長丈餘浮水面斃紹興十年秋沐浴更衣而化

雍正舊志

歐陽仙清流人結廬於豐山順真道院養真修煉後坐化鄉人祀之水旱

迎致能動風雷隨車而雨閩書

黃槐長溪人政和間舉進士第授徽州尹世亂挂冠學修煉術隱居斂迹

垂釣鶴溪卒鄉人祠祀之水旱疾疫禱之必應雍正舊志

張聲字鳴道不知何許人通易象辟穀煉氣得養生法宣和中間遊延平結

廬溪源山有范氏子從之夜忽有客叩門知爲異人拜求道術客取二丹

還范以飼之自是絕烟火食一日往郡西花心洞留一頌於舟躍入水識

者謂爲水解去南平縣志

徐知常字子中建陽人也能詩善屬文凡道儒典教與夫制作無不該曉

方闡道教首預選掄校讎琅函玉笈之書無不精確畫神仙事蹟明其本

末位置有序仙風道骨飄飄凌雲蓋善命意者也舊嘗有痼疾遇異人得

修煉之術却藥謝醫以至引年白髮紅顏真有所得宣和中除藥珠殿侍

宸宣和書

陳通長樂人與弟靈皆有道術能驅雷雨除祟宣和中召至京符咒輒驗

徽宗悅之俱封王爵歿後人多祀之

閩書

三公漳州人未詳其姓兄弟三人得導引修煉之方又善八門遁法嘗率鄉人禦賊草木皆兵賊遂敗後結茅節惠里山中

今龍巖地

人覓之輒黃霧四

塞不知其處里人名其山曰將山

閩書

梁野一名戴長汀人兵部郎中灝之弟自號野人居天慶觀左嘗遇神授以致錢之術每欲錢縮手一振錢輒盈袖益放曠歌酒施捨貧乏人目爲狂嘗久雨彌旬薪粒告盡母責之戴曰所須幾何母曰多益善爾翼朝戴引薪米數十擔從外來母曰善哉兒多固好顧安所得錢乎戴曰母幸無慮振袖償值一一如數無欠無餘母方異之天慶初灝守廬州野衣敝衣藍縷入謁灝命沐浴更衣拂而去忽不見求之弗得明午旅邸有告曰昨夜有道人抵宿晨起窺其室但見錢垛半壁不復見人灝遣官吏破戶見錢上有書云弟野以烟蘿偈久俟不果進辭冀珍重有少錢煩有貧乏仍遺所服敝衣異香襲人殆非人間所有灝感歎久之自是不知所往

閩書

黃惠勝宣和間道人自永春來居安溪翠屏山之小尖峯嘗結臺峯頂曝
身求雨後語入曰劉寶來吾庵其爲廳事乎遂徙居大尖初徙時尖有異
光人怪之往觀則惠勝在焉因巖架屋屋用鐵瓦悉飛遞而至紹興中汀
寇至鄉人築砦以禦之朝廷遣官捕寇兵果駐此其官劉姓實名道光舊志
林虛極善鼓琴蚤歲爲道士籍名天慶觀年三十雲游名山宣和間至京
師時興七科虛極中琴科引御奏琴稱賞凡八宣召賜資有加差知神霄
玉清萬壽觀號金壇郎尋乞歸雍正舊志

張道成號欵菴長汀人少依梁教師學黃老術得業去後不知所終

饒松沙縣人不樂婚娶入山採薪遇二人奕視之忘返奕者曰可歸矣送
之出遂落魄不羈爲人傭田識者謂其有道術時旱主家謂之曰聞君有
道術能令水逆溢乎松穴地作坎引水逆上須臾溢漲每耕耨處有片雲
覆之坐化毗山鄉民肖像祀之文天祥募兵勤王道經菴下士卒乏泉渴
甚松幻一道者持壺漿犒之隨遍一軍天祥異之問所繇言姓名居止倏

不見入庵觀像儼然持壺者也事聞封祐正大師

劉夢鼎崇安人母未孕時夢一羽衣手捧三足香爐至其家曰以此寄汝當有嘉應後孕十二月乃生因名夢鼎少聰敏博學師事侍宸黃雷困得清微道法王行靈寶齋醮多有異應曾於邵武九龍觀建黃錄大齋而枯井湧泉天降甘露四方從學翕然後沐浴坐化

陳某侯官人世以巫顯往來興化縣郡中郡人疫癘經其呪治者皆全活沒而興化人祀之

張與玉號霜崖福州人嘗遇異人授以秘訣煉伏火丹從黃宗師授雷法得飛神御氣之妙歲旱禱求立應

以上閩書

張自觀不知何許人

案舊通志張作陳列泉州方外續志據德化縣志改作張列永春方外皆以爲閩清人

初煉性

於德化蕉溪山石鼓巖見石牛山洞夜火晶熒知有魅因至其處魅方迎婦人家輿徒甚盛自觀出掌令人從指縫窺之魅悉現形其家大驚求治自觀乃幻爲女妝坐籃輿中羣魅昇之入洞自觀躍出與之鬪懸崖上下

趾踵入石數十處竟奪其洞坐化鎮之

道光舊志

陳以文字文仲同安人清修學道居天慶觀三十餘年守倪思雅敬之慶元間賜號守素冲虛大師

閩書

棲霞山人寄居棲霞道院自號海門甚有道行且善書畫非賢士大夫不交人莫詳其名氏第稱之曰海門子後不知其所終

全上

郭道人不知其名字居武夷山自稱卧雲子能豫知人禍福紹興間潮州作洞賓純陽會有諸處行正自號洞陽子道人遇諸塗言其平生事如目睹行正大異之即挽歸事以師禮後道人坐化於武夷山昇真洞旁巖石上行正亦坐化於鐵板嶂

道光舊志

馮觀國邵武人游方外遇異人得內丹之法自稱無町畦道人好以詩贈人語多不可曉寓宜春二年言人吉凶盡驗或有誚其醉狂者觀國以詩謝之曰踏遍紅塵四百州幾多風月是良儔朝來應笑酡顏叟道不相侔風馬牛紹興中端坐而逝郡守李觀民爲塑其像於泊平觀

八閩通志

吳十三道人建州人住本府仙州山給侍開善紹興庚申三月八日夜適然啟悟占偈呈善曰元來無縫罅觸着便光輝既是千金寶何須彈雀兒善答曰啐地折時真慶快死生凡聖盡平沈仙州山下呵呵笑不負相期宿昔心

閩書

蘇紹成德化人委業天慶觀後隱北山朱文公嘗造其廬書廉靜二字贈之且銘其琴曰養君中和之正性去子忿慾之邪心乾坤無言物有則我獨與汝鉤其深

全上

趙永嘉初爲同安主簿廳卒後隱晉江金鞍山喚虎守室鄉人或饋之酬草一楹怪之棄以飼牛牛連日酣睡驚問永嘉復遺草解之始醒知其異再求不得名其草曰祥芝云嘗行山下遇同人寄語曰致意朱公蓋永嘉爲卒日適朱子在官也朱子嘗就訪之相與游覽山川之勝曰此地二百年後當爲車馬之區今永嘉至元時尙存與虎岫僧嘉善往來

道光舊志

福建通志

莊元美

案郝志作陀羅仙名莊元非

長溪人嘗夢游陰府吏命誦度人經且曰汝前生

陀羅天知之乎元美唯唯既覺朝夕受持不息每誦經有五色蝸牛數百

集花木上若諦聽者自是不食煙火乾道六年家人夜聞戶外有聲燭之

見五色鳥大如掌高六尺許元美曰雙鸞至示吾期矣書偈而化

道光舊志

葉森南安高田人父廷顯母陳氏廷顯樂善好施嘗夜夢三桂交柯飛星

入室晨興異香撲鼻未幾陳氏有娠淳熙十六年誕森幼穎異獨居凌雲

堂不茹葷不授室亦不與庸俗人偶吉凶禍福所言多奇中嘉定元年年

二十歲一旦沐浴更衣端坐而逝鄉人立廟上官屢著靈異凡有所禱如

谷受響嘉定末有功於世勅封威武惠澤尊王

南安縣志

郭公漳州人居郭邦社少游九侯山遇異人授異術每禦寇輒立奇功既

歿有靈鄉人祀之

陳藥山福安人有道術能縮地驅雷降雪行符咒水逐瘟疫今祠祀之

雍正

舊志

楊虔誠龍溪人年十四棄俗入道自稱白衣道人厯住名山偶於天寶山
夜坐遙見東北方有天燈雲旗之異遂自古谿吳峰至長泰天柱山止焉
有犬隨行蛇繞地若爲覓址者因卓錫其上鍊氣閱形後不知所之
邱公不詳其名坐煉於靈巖後石空中晝夜靜思頓然覺悟一旦坐化留
詩曰本是瀛州仙子徜徉元化洞天笑指蓬萊歸去沖飛杳入蒼煙人因
號其巖曰邱公

丁智清崇安蘆峯道人 also 少居邑之豐陽里聞人讀盤山頌遂大悟結庵
蘆峯能豫知人事一日謂人曰吾來日往迎曹王至分水遇焉遂同歸庵
中明日王下山人問宿何處王但回顧一指及問者至則智清已書曹王
一指庵矣

張道源德化人紹定中遇異人於九竇溪使負之渡曰我泰山佛傳汝心
印自是靈異一夕夢神人導往異境古木流泉石巖可居及登龍湖山宛
如夢中遂隱焉龍湖一名太湖後居安溪巖巖亦有湖仍以太湖名初構

巖時安溪有巨室山多杉木道源募之施其人曰視木末折者卽以相奉頃刻風起木末盡折旣得木遠莫致忽自上頂湖中次第挺出匠告曰木足矣乃止今木頭半挺尙在湖中

以上道光舊志

陳朗字子彝德化人遇異人授以草履受而著之行疾如飛百里立至人

呼爲陳朗仙邑葛坑山上有陳仙跡

雍正舊志

晏仙人失其名清流人生明溪田家樵蘇山閒見道人以啖餘半桃遺之晏食已欲與語忽不見歸累日若醉若夢家人省問似不能言者旬餘少愈不復煙火食所嗜惟果實清泉而朱顏黑髮肌膚潤澤且能言人禍福

鄉人呼晏仙人

道光舊志

陳麻哩長汀人學道廬山能以符呼役鬼神嘗馳祠中泥馬出入鄉人異之塑像石王廟葬寅湖春漲水溢不能及墓亦仙跡也

雍正舊志

饒公歸化人牧羊至瑤車嶺遇仙人授桃一顆自是得道在均山坐化鄉人塑像祀之雨暘祈禱甚靈庵外有古井一口大椿樹八株相傳爲饒

公手澤云

道光
舊志

張淡三山人初游武夷山隱其姓名一日登天柱峯半坐化石上旁有蟾

蜍人因稱爲張金蟾迄今其蛻猶存

福建
續志

黃咸中本東陽人嘗假宿武夷大至峯止止庵夜半有道人自月光中來
坐盤石出書一卷銅印方寸其文迺清微訣法曰佩此可濟世延年時有
綵雲捧月令更名曰慶雲與約七十年後當再會此咸中再拜問姓名答
曰東南子卽騰空去咸中自是棄家徧游名山參求至道住洞空山二十
年後歸武夷蛻化時年九十適符其約云

道光
舊志

卓彌真仙遊縣鋸匠也游泗州臺山遇何仙授以二桃食一留一仙問故

曰留以遺母何仙許之自是靈悟能行符咒水以愈人疾後結庵於鳴峯

山白日坐化里人祠其蛻骨焉

雍正
舊志

黃樸武夷山三仰峯道人也家樵川性慕道求仙武夷逾數月無所遇忽
於白雲巖下見草庵有道姑屏處長眉紅頰問樸所從來答曰洞天有名

福建道土事宋

無實仙不可見也日暮道姑止宿庵中樸曰於禮不可危坐戶外半夜有虎咆哮而來道姑開門呼之答曰寧死於虎堅坐達旦道姑歎曰君真有志洞天去此不遠然尚隔深淵非臂羽足雲不可渡君試往若遇樵者當拜而問途樸遂行至水次果遇樵者如道姑教樵者怒曰饒舌老婆妄洩吾事遂令樸閉目挽其衣步雲而行俄至中岡見宮殿崔嵬一人碧冠朱履謂樸曰爾何遽至此宜速歸積功累行他時或可再來遂與胡麻飯食之出至崖下同望道姑與庵失所在樸自是絕粒蛻化於此峯

鄧法沙縣人習靜於龍會山中得祐正大師饒松心印嘗自杉口歸以笠爲舟以杖爲楫後斂柴自焚而化所遺法器法衣不火亦焚

雍正舊志

詹道人居高鎮山洞穴中精針灸有時不食連日酣寢人目之曰鷓鴣仙

呼其穴曰詹道巖

名山記南安縣志

元

陳義高長樂人早得仙術元世祖召賜金幣歸遇貧者悉分與之又精兵

機晉王北征命從行時方溽暑王欲試其術召令降雪義高齋沐飛符麾以皂旗雪紛紛下後賜歸端坐而化

閩書

歐陽器虛宋元之際莫月鼎高足也善內煉精炁結爲嬰兒從頂上出入飄然御風倏忽千里而本身偃然存靜室中若酣睡也器虛弟子馬月林嘗侍於浦城之青華道院值方祀宣聖月林問曰老釋修煉不與生死爲變儒學不然未知仲尼之神果長在否器虛曰善哉問吾出神觀之於是入室靜坐少頃出與月林云初至文廟時見一人絳袍玉帶周歷堂廡自左門入向右門出進而問之曰文昌帝君也天帝命我爲宣聖履察耳言訖步虛而去良久主祭官陞殿祭酒讀祝時見一道太素之氣自天而垂

貫入殿庭祭畢冉冉復上

上全

王與敬號秋崖福州人少遊湖海參訪高真留雷州遇亢旱祈禱大應城中妖興夜聞人馬聲與敬治之頓滅朝廷宣賜至道玄應通妙法師至大二年奉旨還山護武夷冲祐觀有句云依然拂袖歸山去止止庵前伴白

雲
夷山志

周頤真少遇西蜀異人授以奇書及壬遁返閉之秘因自號山雷子後從
開元觀道士蔡術嗣靈寶法凡玄學運用悉以易變通之元統甲戌歲旱
郡人請禱頤真默運電出袖中雷雨隨至未幾有訐其左道捕之頤真挺
身立州橋石欄側捕者不見也一日命筆書曰我從空來我即空我向空
歸空自在開書

林文能號存心三山人博極羣書頓悟元妙嘗獲銅符於換骨巖治病立
驗善熊經鳥伸之術居武夷大王峯頂辭召命不赴賜號講師泰定間無
疾而化年九十五天鑑池側所遺石曰乃其結廬處也

彭曰隆號隱空崇安人未知學聞讀清淨經有悟能飛步武夷諸峯不擇
危險居沖祐觀遇異人授以雷法後師黃雷困傳清微道法禱雨暘治沈
疴無不立應信口吟詠深得理致嘗自讚云五五二十五只管從頭數到
底一也無松梢月當年正七十五所居深微太和宮虞集爲記

張宗華沙縣人有道術精六書嘗過淘金山之古佛巖有鬼數十遮道飲茶宗華手書喫茶去三字鬼尋遁巖側有石如幞頭狀宗華卒後鄉人以

此石肖宗華冠服有疾病輒禱之

以上道光舊志

吳濟川德化人隱居雪山金液洞鍊液養真絕火食飲水而已至正二十七年端坐而逝明日神往莆田塑像家曰我泉州德化金液洞徐友山也請塑吾師像匠至其徒問誰召以名告相顧驚異蓋友山即其徒也雍正舊志金志陽號埜庵永嘉人初修煉於龍虎山後隱武夷鐵板嶂與匡廬道士淵隱不爐不扇蓬髮不櫛人目爲蓬頭仙修丹之士依之者成市閩書

項此舟修道於古田仙亭山能行雷法有薛姑者請往其家頃曰我衲衣未乾薛請益虔頃乃仰天言曰借我一道日光曬衲衣頃刻日出一衲處

其衣果乾日亦旋沒時往來於東山崇直道院臨終雷雨驟至立化

福建續志

歐陽大一號道清清流人元季鍊氣豐山蛻去有五言詩傳於世

汀南存

明

上官道字一明建寧人容儀蒼古善楷書洪武初嘗爲吏棄家結廬龍井坑通道術能愈疾祈禱旱澇年七十七絕粒而終

建寧府志

張迪哲字如愚長樂人爲道士工篆隸洪武十七年授上清宮提點

道光舊志

俞震齋沙縣人秘傳符籙精五雷祈禱術同時有黃天玄者住持宜福觀亦能此術洪武二十年省城大旱藩司召二人祈雨既至分東西立壇私約曰吾二人雨當有辨乃以書符硃墨二硯分投水缸中須臾雨至一壇水黑一壇水紅時有贈之詩曰三日登壇三日雨一聲號令一聲雷俞晚居其里之三官堂一日有老媪求救曰吾某山母龍坐行雨失律當午時震死過午無害矣惟法官可解此厄俞曰能幻形小之藏我鉢盂中乎龍卽化小蜚蜚投盂中俞以令牌覆之端坐以俟須臾暴雨擊至數遍過午乃息俞呼龍曰可以去矣龍出仍化老媪拜謝約曰有所雨當如命効力每三年輒一來朝至今六月初有暴風疾雨由南而北必曰龍姑朝俞

云

閩書

宗乘福寧人洪武中以竹竿爲筏逆風浮海三百餘里至連江山中將火

化鄉人請曰師去何以爲惠乃於火中躍出一盃一履以遺去後之思

道光

董伯華晉江人性至孝母嗜膏豚因習屠後得道術於吳雲靖遂棄去成

化時居清源山時游城市書符掌握中伸之有雷聲市上羣兒投錢與之

買伯華得錢鬻食散其餘以給市人有郡小吏郭姓者郡守熊尚初悅之

汀賊鄧七逼城尙初趣兵與戰郭當行伯華告郭父曰毋往也吾昨見師

之出矣皆喪其元者其父曰府君欲之焉避害伯華以藥餌郭暴下用是

得免於難將卒遺郭青石曰此雷石也小兒有病就石磨水飲自愈及卒

後郡中旱則禱之以其能召雷云

案宋列仙亦有董伯華而同異互具見全上

章志宗松溪人居於邑之文昌觀習五雷法而篤好詞翰弘治間年八十

餘有詩曰自吟還自和佯醉卧蒼苔爐中未熟日月漫相催志宗所著道

遙集二卷皆此類

東越文苑

張景真福寧州人修道于真慶觀性警悟能吟詠正德初領道會司入京以符籙顯拜爲真人建宮於流沙河四方師事者甚衆

陳本潤自號清心延平人正德閒提點居元妙觀得玄牝法遇至人授以洞天秘訣遂能叱咤風雷時大旱郡守孫衍令祈雨立應年八十鶴髮童顏忽謂衆曰我擇三日蛻去矣果於是日端坐而逝

王仙翁不傳其名正德閒王守仁以言事謫龍場迂道過建溪舟覆幾殆有漁人泛溪拯之抵岸方徘徊閒遇一道者稱舊相識邀詣中和堂主人處盤桓數日主人卽仙翁也臨行作詩送之云十五年前始識荆此來消息最先聞君將性命輕毫髮誰把綱常重一分寰宇已知謗令德皇天終不喪斯文武彝山下經行過好對清樽醉夕醺

汪道人建寧府人居武彝山自號癡頤子又號麗陽嘉靖初修真於接筭峰遺蛻葬於峰之石壁三山徐渤游武彝得其手錄吟稿一冊中多佳句答葉東林云柴扉終日對雲關何事游人興未闌花雨正迷蛻角競茶煙

初歇鶴聲殘閒儲白石資荒歉旋種丹田不屬官近獲兩枝歐冶劍請君
夜傍斗牛看又如石榻枕泉眠竹影柴門留月浴金丹紫檀匣鎖元中印
白玉絛懸肘後符曉炊石鼎三甌雪午枕山屏一縷煙又如幔亭峰下塞
雲外流水飛花送小舸夜宿山房清不寐紫簫吹徹月華高赤壁元堂水
火交青山旋繞白雲坳枕琴卧誦黃庭罷新月鈎簾傍竊巢皆絕無煙火

氣

以上道
光舊志

江澤邵武人俗謂之澤仙嘉靖閒郡大旱太守束幣召焉至則結壇而祈
雨隨至後結茅於翠雲庵一日出北門見一勾者出其腐腸滌於橋下澤
熟視知爲呂仙游戲也乃哂曰何必爾勾聞之曰誰爲饒舌乃雷部老判
官乎澤歸卽端坐而化今其法猶存里人習之禱雨輒應

雍正
通志

王廣建安人幼嘗隆水波濤中忽有一僧挾之登岸嘉靖閒依楊道人學
道於武彝勵志苦修遇異人指授每登山人恆見有兩王廣云將化前一
日語道衆曰我卽日欲歸奈師遠出未旋何既數日又曰師今至某處矣

策杖迎之師同語以欲歸之事師戲曰汝何日歸曰明日師曰我方欲架屋姑少待應曰諾又月餘復問師曰今可矣但下何日答曰明日師猶不信詰朝齋沐端坐而逝

潘清泰安溪人嘉靖間築精舍於瀨林之龍潭攻儒術重躬行實踐之學晚遯跡黃冠居蓮葉山麓惠安李愷過訪與談道奧贈之詩一日疾作召家人沐浴更衣畢徐言鼎湖雲暗處華表月明中了此平生事優遊上帝宮遂坐逝

以上道
光舊志

王破頭不知何許人頭破一罇故名嘉靖中來上杭假寓縣北有童子鬻茄破頭戲取茄置頭罇中頃刻而盡童子泣破頭笑曰勿憂茄還爾家矣歸視果然元夕讌坐談蘇杭花燈之盛破頭語眾暫瞑目可隨我往眾因徧覽其勝少頃即還居一歲辭去眾約同時分餞以試之破頭同時分身赴宴比曉遂不見

雍正
舊志

卓晚春莆田人生嘉靖間自號無仙子亦曰上陽子人呼爲小仙八歲善

算雖累千萬不爽言休咎皆奇中初不識字十四能詩十六善草書唐順之爲作小仙草書歌贈之當道召之輒與抗禮冬月履霜雪著黑麻衣背加青紗帕子而已雖寒夜必露宿石上或走浴溪浹飲水十數甌曰漂我紫金丹也甲寅歲託言北行過江橋謂人曰我去後橋石折莆陽變矣丙辰橋石果折壬戌遂有倭陷郡城之變後蛻化於杭州淨慈寺

名山藏

林兆恩字懋勛興化人生有異質少時好袖金散貧人母詰之對曰捐有餘補不足天道也補弟子員棄去學道嘗遇卓晚春授以仙訣治人病輒愈賑饑掩骸喜行善事世稱龍江先生

雍正通志

張美字賓陽平和人少爲諸生得林兆恩良背之學大有契合與卓晚春友偕游名山探洞府深談密證人不能測居數年晚春將別去畫梅作詩爲贈美臨終晚春復至呼曰行矣吾遲汝於六橋美一笑而逝

黃胄字司成寧化人初爲國子生後棄舉業學道師事林兆恩授九序心法力行十餘年著河洛先方諸書別有發明或問唐棣詩作何解胄曰此

猶儒者活潑之旨也非靜非動亦靜亦動有如唐棣之華偏其反而者若
費尋思便隔萬里若未之思卽此便是何遠之有彼氏風旛之喻拈花微
笑之旨皆襲此意耳其解悟超脫類此學者稱爲夔軒先生

張徹平和人字道隱世居瑄溪得林兆恩良背之學終身不娶好學深思
所引說經義不依訓詁自見大意善書非其人句一字不書嘗夜坐虎入
踞庭中頃之趣使去侍者問曰何兀然不動也答曰虎噬人出人不知覺
在先則彼不得舒其怒矣其立說平實如此

以上道
光舊志

李學仕連城人受業莆田林兆恩傳修煉功雲遊方外闡釋養生術隨在
有驗後易名遁跡不知所終

閩書

方燧邵武郡庠生早孤事母至孝嘉靖三十二年元旦遇異人於庠之泮
橋授以秘書燧歸閱之遂棄儒業建昌有游生者慕仙若渴偶夢仙導見
一人儒冠道服年可七十童姿鶴髮丰神飄然囑之曰汝師也覺甚異之
萬曆六年燧偶遊益藩游遇於途卽夢中所見者遂拜而師事焉時益王

蹶折臂痛甚世子求燧治至則已知之矣授之秘術痛即止不數日愈王喜甚召之燕賜金帛不受王築壇別院待之世子朝夕執弟子禮居九年世子從壇中見紫光結聚異香滿座謁壇視得紫珠數十顆鮮明五彩進之王曰此寶也以遺燧燧館王所十四年一日遺書游生三日後召諸友賞雪如期至果大雪酒半酣起囑眾曰予叨王祿養久無以報今辭王歸矣遂端坐逝逝時人有見燧儒冠道服曳杖逍遙從府中出北門去閩書道通侯官人與其徒七人居永福高蓋山飲水啖草禮念精勤六人皆以不堪引去有德完者獨堅持不少退歷十九年道俗咸皈依焉嘉靖末有道人圓滔者宴坐荒穢中久之頗能役使鬼神知人休咎道通過而呵曰大德修行迺使鬼神得窺其際非吾徒也圓滔矍然幻心頓滅鬼亦不來矣

孔希島不知何許人善鼓琴遨遊海上問其家不答問其年不知冬葛夏裘遺之錢不受受輒以與人時鼓琴數行遇豪貴即避去往來泉州四十

年貌不加老有知之者曰此地仙也與顏頭陀各百三十歲矣隆慶中卒
層仰庇葬之南安九日山下而志其墓

徐麒沙縣歷東人萬歷閒得異人傳授遂契真仙踪蹟靈幻其身在家或
有見於江浙者值大旱鄉人禱雨不應麒曰吾能請之不移時果大雨深
二尺又善治病不用方藥以水噴之即愈一日抵家候母兄鳳以未來事
問答曰鷄不鳴鼠必成丁酉鳳果卒鳳子登瀛以庚子領鄉薦麒言皆驗
以上道光舊志

廖半仙未詳其名泰寧人家貧傭耕養母一日出樵採遇二老人弈山中
食之二桃半仙不食置懷中欲以遺母老人曰速食之語未畢桃自懷中
墜遂滾入石半仙逐而啖之僅半起視二老人忽不見自是有力善負常
爲人築田埂取巨石數十人不能扛者手掇之裕如也平疇無水插秧須
雨族人謂之曰胡不取水灌田乃袖手望天平遂荷鋤往將鋤柄撞入石壁
中大呼曰水來矣水來矣拔柄泉湧汨汨不絕灌田數十頃一鄉賴之人

呼爲半仙閩書

林道人延平人莫知姓名得仙家鍊金之術以拯濟貧乏爲主有負人求其術不得恨之告之守守怒隱捕之林已在門矣遽召入秀眉美髯姿出格外守望見已心異之詞色稍和試之術命取水銀一大錠計重二鎰付之林因請水一器投水銀其中用水揉之少頃澄水已成好銀守命銀工就地爲爐依法燒煉果不變也乃禮而遣之而雲間董其昌來閩就詰焉曰憑學士取一物爲驗董取盃中梧子授林方茶次林便投入茶盃隨所指立變爲銀舉座駭愕董曰梧化銀矣可返梧乎林便取再納茶盃食久出之故是梧子也如此者三林曰此真銀矣五百年後不復變也因從容謂董曰某之術通天地役鬼神非其人不授觀學士有些道分故不覺技癢但某常以陰功拯人及物須藉學士高文流傳人世董許之中夜思惟爲道人文吾能之萬一事敗則吾文悞人明日遣家豎持輕縑二端織履一輶送林林已覺迎謂之曰乃公昨許我傳夜半生疑然遣幣致敬終不

失爲長者敬拜乃公賜但請少留貧道亦欲附壽乃公忽拾斷瓦重可十
二鏹取紙包裹曰途中毋發也至館發之則金色燁然宛斷瓦狀董因叩
其大要言曾鍊一神不委何名欲呼之用右掌食指書神姓名於左掌中
指背止二字神立至矣自言讀黃庭內景別有指歸每於靜夜密呼五臟
神姓名其神自出宛若人形並長寸許行動如常衣色精彩其分明者容
髮皆具是神無病如或一臟受瘕則此臟之神颯萎不振隱召使人忙用
工夫巡環呼出便不復爾上

徐集虛在明爲顧闕初客自云宋臨安諸生以術數客樞密趙元鎮幕元
鎮敗集虛亡入閩遇異人授太陰煉形之術能出没人間

白茅
堂集

陳鏗韶福州人年二十餘喪妻遂散家資學長生術時到鼓山絕頂默坐
竟日久能辟穀其父以爲病狂拘繫之見其不食復舍之遂遠遊大茅武
當諸名山途遇鄉人間有識之者輒不與言數年復歸以藥囊遺母鄉士
大夫或慕之迎致他館亦不與言後莫知所終母啓視囊悉乾桑葉也

書

陳真佛龍巖人少時飯牛孳息長佯狂不事家人生產辟穀烏石山中不

知所終

道光舊志

李存忠邵武人性冲和善笑寡言縫衣糊口每得食必懷以貽母母死寄食於兄而以母事嫂嫂狠妬不相容諧兄逐之忠罄身出居昇仙橋之鵲梁下單衣敝席外無長物厯寒暑數十年其口嘿然其容莞然其體充然如一日也或曰一往市或三日一往市餘濃睡而已市中人皆呼橋仙時隆冬有好事者往觀其狀裸體縮足兩手互攀足心熟臥其煖氣猶蒸人大大異之自是往市中無不予者忠亦不受惟酒則飲之一日大雪忠出有飲者見而招之飲畢去衆問曰如此盛寒君第單衣何以堪之忠笑不言衆強之曰內不足故寒卽逸去衆愕然未幾而逝逝之日有人自武夷來者見於其處或又見在白渚橋云時萬厯之二十五年閏何氏子福清人明季邂逅食仙橋遂辟穀傭力養母人仙呼之不善也稱以孝子色乃無忤入清母沒遂委蜺初其母爲娶美婦欲以羈之竟不成

前卷述二傳
婿託疾遣婦遂無嗣論者以爲不當稱孝子云

楊恩初稟

魏雷鳴沙縣人亦精雷霆術童子有欲爲戲與之一錢魏就童掌中作書符狀令緊握之至人旁放手轟雷一聲而散

閩書

李景晞字從心號丹厓子又號赤陽子古田人隱居石平山莊著書自娛於玉液還丹之術尤所究心著有抱元內外篇盈數十萬言又箋註金丹深有祕解兼工詩其宿山莊云半生榮辱已蕭然爲愛溪山結道緣松徑晝閒看鶴舞石牀春暖抱琴眠爐中白虎君臣藥囊裏青蚨子母錢萬事不干朝復暮清風一卷悟真篇秋日寫意云江西秋水碧連天衆妙門開內外篇黃卷已拋經世業丹書不負此生緣療饑白石和雲煮點易朱砂滴露研自截修篁裁一笛試吹三弄赤松邊

道光舊志

林靖樂字紉素閩縣人顯精道術兼通儒教任龍虎山官事有禱輒應永

樂閒賜道錄司右演法任武當太岳太和山大聖南巖宮提點都督

閩書

黃介通閩縣人龍虎山崇禧觀道士儒雅兩全有詩集行世

徐貞一自號元虛子政和人嘗過仙霞嶺關吏訝其異服執之貞一瞪目不答吏繫之郵亭迨夜紿守者出袖中大筆書二絕句於壁日一劍凌空海色秋玉皇賜宴紫虛樓醉來跨鶴須彌頂指點培塿見十洲碧殿歌傳阿濫堆玉笙吹徹海濤開仰天一嘯江風發笑接白雲歸去來中夜遁去晨起盛傳仙人至關走看墨跡不絕於道

柳霖字正芳建寧府人依杜足元居越王山迎仙樓喜畫竹煙雲象外不可方物山麓有泉傳爲霖洗筆處

杜足元建寧府人隱居浦城越王山麓嘗煉丹以救民疾今井猶存

陸道照羅源人能驅雲雷偕其徒之寧德祈雨有樵夫數人曰若祈無雨

我以數擔柴了此人及登壇三日不再諸樵去至將尋之道照以手印鎖之不得動遂以佩刀向天揮舞激溝渠水成雨人皆淋漓師徒點滴不染

王家錄字劍洲仙遊諸生一日遇異人授以丹術歸卽棄所業挈其妻構

閣天馬山居焉

福建通志卷之二十一

萬七道姑仙遊人臨高令朱汝時兒女也名普姊幼而宿瘤父將爲議聘姑曰兒有疾何字茹素七十一年後得道端坐而逝

廖氏女名益姑建寧縣廖士會女生而聰慧父母許配曾嘉瑞曾氏納采女斷髮毀面語伯父士選曰曾嘉瑞妻乃何橋楊氏女子非其偶也隨口誦丹經一卷並偈讚數首士選異之諭弟士會曰有女如此豈肯作人間箕帚耶遂退婚嘉瑞果得何橋楊氏女遠近驚傳其事由是誦經樓上足不踰閭者數年妹聖姑從妹瑞姑刻勵同修不懈以上道
光舊志

清

江士元德化人幼學符錄康熙丙子夏旱知縣嚴屠敬命禱雨士元取水盛缶插柳燒鐵淬之須臾雲雷四起甘霖大沛道光
舊志

楊季雅仙遊人奉母孝不娶捐已產與族人而爲其廝役不倦好讀書以

箕爲案置書其上讀之過日成誦後遇異人得運氣術或旬日不食或一

食兼數日食所言前知皆驗自號無名氏及母卒喪葬畢一日坐化雍正
舊志

福建列仙傳卷一

上古

容成先生黃帝時人嘗棲太姥山煉藥後居崆峒軒轅黃帝師之今中峰下石井石鼎石臼猶存

福甯府志

陶唐

彭祖姓錢名鏗相傳古陸終氏第三子亦謂之寧黃君嘗進雉羹於堯堯封之彭城故稱彭祖又有云商賢大夫老彭隱居是山善養生術壽七百七十七歲子二曰武曰夷同居武夷山山因得名

武夷山志

太姥相傳堯時人以練藍爲業有道士求漿姥飲以醪道士奇之授以九轉丹砂之法七月七日乘五色龍馬而仙因名太姥山

雍正通志

周

韓眾太上霄琅書曰太上真人靈寶文天真皇以授帝嘗藏于鍾山鍾山真人以授禹禹藏于名山水府吳王闔閭使龍威丈人包山洞取之以出

齊人樂子長授霍林山人韓眾今霍童山有左彌峰仙經云茅君爲左彌
仙卿韓眾爲右彌仙伯者是福甯府志

秦

太姥相傳爲神星之精母子二人來居武夷采黃精以餌能呼風檄雨
來雲而行秦人呼爲聖母眾仙呼爲皇太姥今稱太元夫人武夷山志

武夷君相傳昔有神仙降山中自稱武夷君受上帝命統錄羣仙授館於
此漢武帝時遣使祀之武夷山志

劉少公舊稱武夷山王雲笈七籤云武夷爲昇真元化洞天真人劉少公
治之武夷山志

控鶴仙人名屬仁乃天台元虛老君華真仙師第七子也嘗駕鶴至武夷
時魏王子騫與張湛等禱雨龍潭謁見屬仁遂濡雨澤屬仁見子騫等丰
骨異常訪道精確乃遣何鳳兒往天台取仙籍檢視具載子騫與湛等先
以飲酒過度忤黃元真人謫居此山八百年後方得脫骨仙化因授以九

品丹書

武夷山志

十三仙魏王子騫張湛孫綽趙元奇彭令昭劉景顧思遠白石生馬鳴生胡氏李氏魚道超魚道遠子騫或曰魏國王子或曰魏時人姓王名子騫或曰延津人南十里有魏王故城相傳爲子騫所築中有王城廟湛等十人亦不知何許人白石生或稱白玉生或稱白石先生或止稱曰石馬鳴生又稱馬鳴先生胡李及二魚皆女真稱爲毛女子騫學仙於武夷居大王峯下十二人亦以修煉來山中依子騫爲地主後皆仙去子騫蛻骨在小藏峯其頭顱尙在仙館巖罅中

武夷山志

潘遇崇安人先世居中奢

地名在武夷山南

因魏王子騫給奉張湛等十二人移居

武夷山中亦仙去稱爲從神

武夷山志

游三蓬閩清人少孤有田不竟耕以與弟自漁釣溪上寒暑以三莎蔽體

閩清人謂之三蓬或憐之與以短褐數日亦棄之始皇二十二年辟穀不飲食

至漢昭時人有見之武夷山中

閩書

福建武夷山志

秦

漢

大道泉州人修真清源左峰嘗出遊逢人哭問之曰長城之役獨子無兄
弟出身代之遁隱於此蓋尸解後人供奉之名大道巖續志

漢

華子明師角里先生修煉子期山臨溪有子期臺神人指臺前石語之曰
待此石鼓鳴汝功行滿矣一日扣之石果有聲乃入株林山却笠而坐俄
頃雲生騰去福建續志

何九仙相傳本臨川人九人皆瞽惟長者一自上豎獨明後相率鍊丹以
飼湖中鯉鯉盡化龍九人各乘一去今仙遊縣之九鯉湖是也九人始入
閩時蓋居閩縣九仙山山卽以九人得名也又聞漢武帝時齊少翁以巫
鬼事得幸九仙之父詣闕直諫九子力止之其父不聽少翁事敗被誅武
帝召官其父閩中而九子因得至閩中鍊氣成道又云九仙父任俠好氣
從淮南王安游淮南王善之談議寢廣九人懼其及也數諫父謝絕王父
不聽去而入閩鍊丹仙遊縣之湖上丹成仙去及王敗父南行求子不得

而死於巖山今仙遊之何巖是也書

莊君平福州有道人嘗見老叟同室歲餘告之曰吾莊君平也取一書授之天明叟出不歸視其書皆修身度世之說今但記其語云事業與功名不直一杯水夷堅志

梅福字子真壽春人初爲南昌尉後棄妻子去九江傳以爲仙去往來南平衍仙山煉丹玉華洞自稱九江道人丹成上昇里人因取其姓號其村

爲梅岐里漢書閩書南平縣志

徐登閩中人本女子化爲丈夫善巫術東陽趙炳能爲越方善禁咒時兵亂疾疫大起二人遇於烏傷溪水之上遂約其以其術療病各相謂曰今既同志且可各試所能登乃禁漢溪水水不爲流炳禁樹樹卽生夷禁人不能起禁虎虎伏以大釘釘柱入尺許盛氣吹之釘躍出射去如弩箭之發以盆盛水吹氣作禁魚龍立見二人相視而笑共行其道焉登年長炳師事之貴尙清儉禮神惟以東流水爲酌削桑皮爲脯但行禁架所療

皆除後登物故炳東入章安人爲立祠於永康曰趙侯祠蚊蚋不入也後漢書抱撲子異苑

張垓後漢時侯官人或曰晉人初至武夷隱姓名有白草石中拾一古木牌題姓名其上一日登大王峯石巖中坐化遺蛻至今在焉其首右顧相傳將解時其母追至呼之是以顧視巖下云背有白點如錢者六七手有杰字坐旁方石樵者嘗見其上一金蟾蜍昂首向蛻因號爲張金蟾武夷山志

吳

董奉字君異侯官人吳先王時有少年爲侯官縣長見奉若三十許人罷去五十餘年爲他職行經侯官諸故吏人皆往見奉顏色如昔長問之曰君得無有道乎昔在縣時年如君輩今吾已皓白而君猶少也奉曰偶爾耳交州太守士燮死已三日奉時在南方以三丸藥內燮口中後四日遂活乃爲奉起高樓於中庭奉不飲食惟啖脯棗少飲酒來就燮飲食下樓忽如飛鳥一年求去還廬山下時時爲人咒水治病不取錢物重病愈者

但使栽杏五株輕者一株數年有杏七萬餘株杏每熟時奉於樹下作一草倉語人曰買杏者自將一器穀置倉中取杏一器有納穀少而取杏多者虎隨後逐之自是買杏更無欺者奉以其所得穀賑救貧窮供給行旅歲消三千斛穀尙有餘後乃尸解去後人於其栽杏處祠祀焉士燮壽至九十

列仙傳太平御覽引南嶽魏夫人內傳

介琰不知何許人住建安方山

今屬閩縣

從其師白羊公杜泌受玄一無爲之

道能變化隱形嘗往來東海暫過秣陵與吳王相聞吳王留琰乃爲琰架宮廟一日之中數遣人往問起居琰或爲童子或爲老翁無所食啗不受餉遺吳王欲學其術琰以吳王多內御積月不教吳王怒勅縛琰著甲士引弩射之弩發而繩縛猶存不知琰之所之

搜神記

晉

衍客南平人避亂隱郡之北山結廬煉丹丹成舉家上昇

八閩通志

婁師鍾晉時人白玉蟾記謂於止止庵仙去

武夷山志

梁

褚伯玉鹽官人居南霍行遊諸名山上虞吳曇授所傳西嶽公禁止符及制虎豹符凡二卷嘗攜隱居霍童至大同二年駕鶴飛昇

福甯府志

隋

潛翁開皇中鍊形於漳州石壁山養白蝦蟆以自隨後不知所終

八閩通志

劉熊二道士甯化人修煉於石壁之香鑪峯隋義甯間白日飛舉鄉人爲

刻二像於石壁創臺於鑪峯頂祀之曰昇仙臺臺址猶存

雍正通志

黃氏女興化人築室於同安縣東佛子岡修持淨戒後端坐蛻去真身不

壞因立寺曰黃佛泊平中更名鹿苑祈禱多應

福建續志

唐

錢劉李三女仙錢曰鬱香劉曰永志李佚其名俱建陽人同住白塔山修煉貞觀中獵者呂師逐獸入山遇三女弈於石上坐觀之女授桃半顆與食俄頃獵具朽爛歸家幾十年矣鄉人挽師引至其處忽覩圓光百丈三

女昇天因稱三皇元君立靈濟道院奉之兩陽祈禱即應

乾隆續志

蔡如金字叔寶其先會稽人祖夔嶺南節度使永徽初歸過泉州卒葬南安因家焉如金以蔭入仕爲金部員外郎守太原有惠政晚棄簪紱歸隱於紫極宮精思院辟穀御炁以方技濟人後煉丹清源紫澤洞時有鴈使者同遊石筍巨繩於江走卵其上如金反用卵走繩下鴈坐席於水順流而下如金坐席逆流而上又同遊金鷄坐榕樹下如金含酒噴樹木葉盡脫復含酒一嚙葉復着樹鴈則不能也他若石碓村驅蛇金田村救女功行尤不可勝紀卒葬甯壽寺留從効築羅城徙之松灣啟棺惟劍鏡存焉

真西山集閩書南安縣志

章壽連江人開元中得仙術嘗斬蛇延平津中連江香爐山有章仙壇有

勅書碑碣記其事又有煉丹井壽煉丹處也

閩書

案道光志本雍正通志作永福人有牧羊遇王謝二仙事今從閩書

司馬承禎嘗修煉於霍童山跨鶴飛昇又名鶴林

雍正通志

孔莊葉三女仙俱會稽上虞人天寶間棲武夷山天柱峯下一日遇太姥元君授以丹訣教之曰東南雲虛棲神之區三仙如其言至下梅均峯果得一洞因修真其中道成仙去宋治平間歲大旱里人江小三者灌田峯下遇三仙授小葫蘆盛水令灑之是夕大雨霑足

武夷山志
道光通志

杜陳二真人汀州人貞元時寓連城林坊村西山絕頂不火食五十四年

一日遇東華君飄然羽化

雍正通志

羅仙公太和間生於連城寓惠濟橋之廣福堂年六十二往清流盈山庵修煉越數載得道羽化里人以其身塑而祀之表曰真仙凡遇旱疫禱之

無不應者

雍正通志

鄧伯元吳郡人與王元甫同居霍童洞天受殮霞導氣之法積三十四年

內見五臟後與元甫同日飛昇

雍正通志

馬真人福甯溫麻里馬氏女也乾符中入昆田山煉丹仙去

雍正通志

康仙漳州人乾符間賣藥州城自言家在琵琶坂常往來西溪渡口後因

稱康仙渡黃碣爲中丞時朝退每遇之長安市中見其舉止非常揖而問焉答曰我康長史也居清漳員山下碣轉運安南過漳間員山康長史安在人曰此卽員山有康仙祠長史則不之知也碣驅馬追謁神像宛如長安市所見者後碣來典郡欲移祠山椒一夜月明如晝夢仙羽衣手綵箋授之曰賣藥因循未得還卻因耽酒到人間有心只戀琵琶坂無意更登山上山碣乃止

乾隆續志
道光通志

陳蓬號泉

一作白水

仙福甯人乾符間駕舟從海上來家於長溪之後崎嘗題

所居云竹籬疎見浦茅屋漏通星又云石頭磊落高低踏竹戶玲瓏左右

開丹成羽化而去著有陰陽書七十二卷星圖一卷

雍正通志

黃太和侯官人好導引術年三十餘棄家入鼓山大順初趺坐磴鼇橋黃

璞遊山見之問其家世則璞五世祖也璞悲泣請還家不聽明日率家人

往謁不復見

雍正通志

楊樵南安人唐末採薪高田山遇二仙人弈予以桃食其半半欲遺母中

遂失之三日至家已三歲矣嗣後神氣靈異明禍福精岐黃術閩王審知

夫人病瘡召之治不面診緣察焉初繫於木曰木也復繫於犬曰犬也最

後繫瘡灸之立愈王大加賞不受請爲里人濬陂通九溪水溉田

長七里今南安

是也自家陵後有道士七人訪之比送出皆化鶴去楊亦以是日化

道光通志

任放天寶中修煉於福州之大鵬山後於此山上昇因名昇山今洗藥池

昇仙臺遺址猶存

雍正通志

雙髻女仙嘗隱雙髻山後飛去留丹竈於山阿每花朝月夜或見女仙騎

白馬遊雲中

乾隆續志

許碯唐時高陽人自稱高陽酒徒少舉進士不第學仙於王屋山遍遊名

山嘗至武夷絕頂題云許碯自我山尋偃月子到此又題詩云閨苑花前

是醉鄉踏翻王母九霞觴羣仙拍手嫌輕薄謫向人間作酒狂或詰之曰

我爲就宴崑崙失儀見謫衆目爲顛後忽乘雲去

武夷山志

薛邴唐時人李鐵笛洛陽人李磨鏡燕山人此三仙事實俱無可考二李

並名字失之又八曲鼓洞有張草衣亦無名代白玉蟾記謂俱於止止

庵仙去武夷山志

案今以薛係唐人均附唐末

馬仙姑建安人嫁期年而寡紡績養姑出入徒跣展蓋渡溪不假舟筏嘗語人曰我非世人奈姑在耳或旱暵鄉人舉迎祈雨立應後姑以壽終襄事畢遂飛昇去又志言馬仙姑姊妹三人長適霍童青巖氏家性貞潔一日浣衣溪畔忽流仙桃一枚大如斗自食其半餘啖二妹三人同日昇天閩書

馬姑幼學修煉結廬於永春馬姑山巔一日登山採藥蛻形於百丈巖人見其現身巖谷間閩大記

唐楊真人閩清人嘗修真於玉臺山後卽於此上昇鄉人築臺祀之閩清志

五代

劉海蟾名元英邵武人以明經事燕劉守光爲相崇黃老有道人來謁山

稱正陽子爲演清靜無爲金液還丹之祕元英悟卽解印易服遁跡終南山丹成尸解後以道力除蟾崇人因稱海蟾雍正舊志

案朔廣總志謂元英燕地廣陵人

庚臯羅源人以鬻黃精爲業王延鈞時人邑有朱益公者雅好客臯以貧甚歸之又病癰是時益公座中客盡鮮衣絺服無不人人厭臯臯愈益豪居常坦腹臥溪上吹簫笛自樂龍啟初陳守元以道士貴幸客有惡臯于守元者守元怒使監奴笞數百益公自是不敢復留臯臯既困故人朱當敏既背臯去莫顧臯臯仰天大笑因去入仙茅山當敏意臯貧無行陽爲祖道微隨之至羅喜洞洞門忽開其中玉堂金闕橫亘不知其極官屬甚盛建翠旂羽蓋卻行前迎當敏大駭叩首流血畢曰笑之頃之宴客殿上史爲當敏賜僕妾之食坐之堂下居旬日當敏歸時臯及賓客皆送之至洞門客以尺八擊玉磬臯和而歌云朝爲雄兮暮爲雌天地終盡兮人生幾時當敏歸而益公門已邱墟矣凡歷數百餘年榕蔭新簡十國春秋

案靜志居詩話作洪武十二年當敏歸羅源縣志引遇仙記作一異人行乞於市當敏作姓木

宋

劉女寧化人劉安上女育於雍熙初九齡與羽人談道得度及笄許妻何氏子自誓不嫁強送之忽有一白鵝目空而墜劉氏乘之而去

八閩通志閩書

羅仙連城人雍熙間寓惠濟橋之廣福堂年八十二往清流修煉於盈山庵越數載得道羽化里人塑其軀面祀之表曰真仙遇旱疫禱無不應

道光

舊志

劉希岳端拱中道士居西都老子觀遇異人得道號朗然子嘗自言辛勤未踰十年人驚不老歲月俄經一紀自覺如新又詩云夾脊雙關至頂門修行徑路此爲根一日沐浴更衣陳席而卧須臾一金蟬飛出遂失所在

道光舊志

林瞪長溪人嘉祐間郡之通津門火郡人見空中有素衣人持鐵扇撲火

火滅遙告衆曰我長溪上萬林燈也郡人訪至其墓拜謁事聞敕封興福

真人

道光
舊志

鄒道人失其名趙清獻抃宰崇安時鄒以產戶辟爲錄事奉公甚恭一介
不妄取抃秩滿鄒學道武夷山中過昇真洞遇張真君授以九轉丹訣尸
解於幔亭峰

道光
舊志

任熙春邵武人熙寧初夢鐵冠道人儀容脩偉相揖與語旣寤明日至城
南五峰院後遇所夢者自云姓蔡住武夷遣以五花草食之甘美臨別約
相會於昇真洞熙春自是不復粒食惟飲清泉期而往蔡已先至熙春
以水深不能渡止於金身院修煉屍解而去

人記

黃希旦邵武人號支離子居九龍觀修煉簡然有出塵之志熙寧五年作
五福宮成希旦以戒行清淨召至京師後一年以形於太乙宮後復見於
蜀有詩寄友人曰昔遊西太乙今日返成都若問公來事雲藏月影孤

通志

李陶案武夷山志作李陶真云宋時東京人不知何許人熙寧元豐間棲真武夷大王峯偶

出祠牒道眾眎之蓋唐開元時牒也氣岸落落好吹鐵笛嘗遇節臘道眾各於雲房招飲陶赴之諸房笛韻一時並作皆穿雲裂石之音一日同游溪上忽投深潭道眾駭愕追歸則陶鼾睡榻上矣後煉丹於崇安建平里之通仙巖一日留詩別眾吹鐵笛隱隱而去道光舊志

謝實所不知何許人元符中自邵武來寓順昌獅子峯之亨龍庵長眠不食一日與山下告別鄉人設供相留既罷入房而寢眾久候不出啓門視之惟存衣冠時山中樵夫見庵頂白鶴飛去而石上隱隱有腳迹焉道光舊志

裴道人莫知所自紹興中來泉州語音似江東人頭戴通草花行歌於市數載坐化清源山郡人泥軀以祀因名其巖曰蛻巖後郡守某至見途迂者自言裴道人轉盼失之一日登蛻巖慨然曰裴道人在此矣人有所夢

多驗

道光舊志

黃升字正道長汀人能運真氣鍊之一晝夜成白金名曰陳鍊先是蔡道

人自蜀來升與厚道人死城外五里邸中升爲棺殯一日忽有自顓携蔡書來者具言在崆山相候升疑之如是者十餘書升遂往相見再拜祈請示以向時所遇地有文字筆硯在壁隙間使歸誦之忽不見歸發其殯則空棺而已卽往所遇處取其書讀之自是能召役鬼神前知禍福年八十六髭髮如漆後亦尸解

閩書

上官道人延平人辟穀煉氣一日偈云處世紅塵五十八混世獨存今始沒時人若問吾歸處掃盡雲霞一輪月後成兵於廣西見之

八閩通志

張克真號平心福州人初至崇安光化寺得黃雷因清微雷法寺中常有妖狐化婦幻人克真召雷擊狐福寧早克真投符龍湫金魚脚入頃刻雷雨大作州人送經飛鸞渡舟覆溺者數十人翼日他舟過者視覆舟下克真端坐無恙迎拜歸家雷電繞匝張真人薦於朝及命下已羽化矣時年七十

閩書

青牛仙嘗隱永春之桃林人莫識其姓名後人見其駕青牛冉冉入雲而

去相與祠之達理山庵泉南有青牛先生疑此人也

雍正舊志

楊維字耕常其母陳氏年五十有六未有子忽遇異人授丹一粒吞之夜夢大星入懷覺而有娠維生七歲始能言長而好弄不事家人生產學道得三五飛昇呼雷之術驅疫禱雨輒有驗淳祐四年甲辰冬十一月八日鵬裁集姻舊脩然而逝有自臨安來者遇維於途寄蒲扇布履各一遺其女兄計其遇時卽逝日也啓棺視之維隻履在始悟其尸解家人以扇履置於棺瘞興化寺前號清隱妙濟披雲真人建祠墓側肖像祀之

南平縣志

鄭提刑庖人福甯人鄭南之庖人也南登第後赴京師携庖人往至鎮江遇故舊數人設饌飲之數客皆稱善願與同飲食南許之庖人不可曰僕能事主他不願也強之不可啗之利不從南怒遣之歸請曰遣歸甚善但恐鄉人不解得遣之故願乞一家書以行許之抵家啓所寄書乃卽當日發也家人驚訝庖人亦失所在南聞歎詫且自負平生遇仙嘗食天庖珍品必享上壽後果年九十七而終

閩書

陳泥丸名楠號翠虛得太乙刀圭法捻土爲藥投疾輒愈人呼爲泥丸一日在漳州赴鶴會自言我當尸解遂於漳浦梁山下水而逝葛縣尉在

漳州見之泥丸寄書使歸達其父卽解去日也

雍正舊志

吳山道人三山曾陟館於海鹽陳氏七載有道人自吳山來謂曰子思鄉切何不暫歸乃剪紙爲馬令合眼上馬以水噉之其疾如風囑曰汝歸不可久留須臾到家門戶如舊妻令入浴易新衣陟曰我便去妻曰纔歸便去何不念父母妻子乎陟便上馬行所騎馬足折驚寤乃自在書館中隨身衣服皆新製者道人亦不見惟留一藥籃中有詩云一騎如龍送客歸

銀髮綠耳步相隨佳人未許輕離別不是仙翁豈得知

括異志

道光志

張耒字季益閬縣人蚤有文譽銓吏得選不赴歸師事王蟾得太

乙刀圭火符之術王蟾謂於耒乃仙家父子也耒隨鳳邱山與妻潘蕊珠

烹煉丹鼎後俱尸解詔封鶴林真人

雍正舊志

司馬湘寧德人徧遊天下嘗醉於湖州坐靈溪水中終日衣履不濕能指

溪水逆流又令柳樹隨溪水來去橋斷者復續後居霍童山煉丹既成駕

鶴飛昇

道光舊志

程姚尹三道士俱寧德人程姚修煉霍童山中丹成羽化尹邑之外渺溪人與同里湯姓者學法於間山道士尹法精於湯湯忌而逐之尹鞭石入

霍童後遇異人授祕訣遂仙去

道光舊志

黃七翁上杭巫也縣未立前

案淳化五年始改鍾寮場爲縣

有妖怪虎狼爲害七翁與其

子及婿倖姓者三人皆有異術往治之羣妖遂息因隱身入石壁露三像

焉風雨時常聞鼓聲民立廟九曲溪香爐石下曰黃倖仙師廟家繪像祀

之

雍正舊志

周霞

案閩書霞作露今依攻媿集周真人祠記文

字史卿遇異人得養生術妻氏楊億女孫也

亦有隱操與霞共棲邑之油果山霞煉丹二十年一日風雨大作失丹所

在霞出神求之語楊曰七日來復未七日有僧來告楊曰學道外形骸夫

子寄也而遂棄之矣楊遽焚霞身屆期霞神返舍失其軀歎叱而行後屢

著靈異水早有禱輒應詔封冲應真人

道光舊志

徐頃崇安人嘗於三髻山遇仙遺以果啗之歸卽辟穀歲旱邑令諸葛延瑞召祈雨登永隆寺鐘樓望三髻諸峰狂呼招之片雲四來大雨隨至後尸解鄉人祀之望仙庵

雍正舊志

朱大仙建寧三溪人失其名舊傳尸解於三溪山中今稱朱仙嵎歲旱鄉人取嵎頂石迎下雨隨車至四方信奉之

雍正舊志

蔡道者永福人鄉人於水得樟木欲雕長眉老佛適道者至自言精於雕刻願得樓居成之因攜木登樓去梯久之寂然無聲鄉人登樓不見道者惟木像在遂送方廣巖中至今猶存

雍正舊志

曹道翁不知何許人宣和間始至清流縣邂逅道菴初成遂居焉狀貌甚野青巾短褐終日兀坐居數年稍合藥濟病得者輒愈每入市必大醉有尾而伺之者但見其行趨酒家據床而酌取金於袖無餘無欠至茶食肆亦如之不則經旬不覺或詰之曰翁無生計百需無窘營作何狀對曰我

能呼錢或求其術曰吾所呼者皆深溝巨壑久湮之物汝若傳之必覩人
帑藏禍及身矣登真觀道士丘居通慕而歸之嘗獻金一千二百爲製衣
用翁分取諸故笥果得之如數因令居通爲之碾藥令自摩頂曰可使髮
髮不白後居通年八十四髮無一莖白者獨皤然其鬚或扣之曰碾藥時
未鬚也邑有賴岫者攜女子來遊翁取藥小劑令嚥之撫其首曰爾終身
無病通夕無便旋矣果如其言一日戒徒曰吾將有適葬我庵後數日菴
隣江鐸者見翁幅巾肩傘過濟川橋江還知翁已死發土啓棺無一物乃
悟其尸解云聞書

董伯華晉江人服氣煉形談徵應輒驗能於人手中作字開拳有雷聲震
起後尸解北山紫極宮人卽其真身塑像祀焉祈雨多應案明泉州方外
亦有董伯華其
事蹟與此有同異互
存之道先舊志

葛長庚字以閔一字如晦閩清人祖有興任瓊州教授長庚以紹興甲寅
三月十五日生母夢食一物如蟾蜍覺而分娩名之曰玉蟾父沒母適雷

州白氏故又借白爲姓以在瓊州生故號海瓊子或號瓊瑄海南翁瓊山
道人後又號蠙庵武夷散人神霄散吏七歲能詩誦九經應神童科命賦
織機詩與王司意拂不第後母亦亡白氏驅之乃依於王四四本道者隱
雜流中乃取諸家符籙盡授之戒曰不可妄用也後忽不見白乃遍遊海
南復游甌江西四明師翠虛陳泥丸九載蔬腸絕粒而道成翠虛遊方外
必與之俱逮翠虛解化於臨漳長庚乃鍊丹於閩清之芹山往還於羅浮
霍童武夷龍虎天臺金華九日諸山乃於黎母山中遇神人授以洞玄雷
法能呼召雷雨馘攝精魔以及九靈飛步太上紫樞玉晨洞陽飛梵煉度
之科所用雷印常佩肘間萬年宮道士曾得其傳初到武夷時無有識者
獨詹琰夫異之乃重建止止庵以居之嘗過鼎州謁報恩觀夏日池蛙聲
噪書符投之而止所至祈禳輒有異應時言休咎警動輦俗姓名達於九
重養素之褒笑而不答咸疑爲張虛靖後身又自悟本微垣九皇星之紫
清有願從之遊者莫得也僧孤雲以玉蟾博極羣書貫通三氏欲乞其爲

僧以光禪林玉蟾笑曰禪宗一法修靜定之功爲積陰之魄以死爲樂涅槃經所謂寂滅是也吾煉純陽之真精超天地以獨存道不同不相爲謀也孤雲奇其言亦從事於道焉其在羅浮多有詩文舉頭跣足一衲敝甚而神清氣爽與弱冠少年無異喜飲酒不見其醉博洽儒書究竟禪理出言成章文不加點隨身無片紙落筆滿四方大字草書視之若龍蛇飛動兼善篆隸尤妙梅竹而不輕作閒嘗畫祖師張平叔薛道光及自己像於所結三一菴數筆立就工畫者不能及嘉定中詔徵赴闕對御稱旨命館太一宮嘗遊西湖至暮墮水舟人遶湖尋不見旦則長庚在水上醺然也會臣僚有言玉蟾左道惑眾者遂行至臨江軍飲江月亭躍身江流中眾疾呼舟援溺玉蟾出水面搖手止之而沒是月見於融州老君洞由是莫知所之或云尸解於海豐縣詔封紫清明道真人所著有三一庵詩一卷百八家符篆記一卷

羅浮志瓊瑄摘橐唐胄序史纂左編蘆峯旅記武夷志神仙通鑑圖繪寶鑑湖廣總志道光通志

吳華松溪人幼不啖腥葷至元間棄家入東山瑞巖修煉數日一二過食
凡四十餘年巖傍蒔蔬有盜之者慮其跣而傷足每織屨懸樹間待之鬻
蔬得錢輒以施貧人有病疫迎華至靡不應驗夜趺坐漏園山鬼滿前恬
不爲怪後辟穀數年羽化

道光舊志

周興甯德人嘗學道於福寧州治水西觀後返怡雲一堂學煉丹之法道
成元統間別諸徒躡香爐上昇

道光舊志

明

宋九公福州人棲隱龜溪巖穴中學法間山樂道修真後白日昇天人名
其峰曰飛仙巖今巖上足跡靈刀跡猶存

道光舊志

陳智錄永春人泉州旱郡守令禱雨立應贈遺不受但乞撥郡倉米以濟
永人守難其轉輸智錄手所吹角指郡倉角聲未絕而所輸者已至驗之
運丁皆駝石也因名其地爲駝軍嶺後至山上鄉以劍剖石壁遂入不見

道光舊志

福建滑稽傳

明

鄭堂字汝昂侯官人太守珞之子爲諸生有詩文名而性滑稽自號雪樵山人時正德改元郡守一日於西湖游宴堂故衝其前導守怒曰作一詩可釋汝命紙筆卽書數苦字太守曰汝今始知苦乎堂卽書成之曰苦苦苦苦苦苦天上皇晏駕未經年江山草木皆垂淚太守西湖看畫船守亟遣之至今閩人言作戲謔詩者動曰鄭堂也堂能詩提於占對武廟荒遊無度人人有社稷之危閭僻於一隅鎮撫藩臬諸公日逐燕遊畧無介意時元夕大熱鰲山燈堂題一聯云鰲山北聳今宵樂聖駕南巡何日還諸當事感動曰書生有國家之慮吾儕尙不省乎遂屏迹不出太守唐詢惠政及民無有不德之者時喪妻將殮而目不瞑堂自贊能祝之卽高吟一絕云夫人懿德玉無瑕四十年來鬢未華何事臨終兩行淚恐教二子着蘆花遂瞑公感慟之後終身不再娶

閩小紀高齋筆記

清

林光天字水如侯官人嘉慶間副貢生福州有所謂白字詩者純以里諺方言編爲韻語前輩之詆諸者間亦有作至光天乃窮極工巧名噪一時李布政廣芸之獄實逼於總督汪志伊輿論寃之朝廷命使查辦福州士庶千數百人頂香遮道訟方伯仁賢願建遺愛祠使者據以入告獄遂伸祠亦竟實光天爲之倡光天先有白字詩傳聞道路改易杜牧之絕句數字云清明時節雨霏霏路上行人哭布司借問寃家何處有路人共指汪志伊時方清明節使者已耳熟之布司者福州人稱布政使簡其詞但曰布司也論者以爲有鮑司隸舉幡太學之風羣以此重光天而光天之白字詩亦卽於是歲絀然絕響矣

乾嘉全閣詩傳
石遺室雜記

福建伶官傳

五代

王感化建州人南唐伶人保大初中主初嗣位春秋鼎盛留心內寵宴私擊鞠略無虛日嘗乘醉命感化奏水調進酒惟歌南朝天子愛風流一句如是數四上覆杯不懌厚賜金帛以旌敢言且曰使係陳二王得此一句固不當有銜壁之辱也翌日罷諸宴賞留心庶事圖閔弔楚幾致強霸感化善謳歌聲振林木中主宴苑中有白野雀飛集合感化賦詩應聲曰碧山深洞恣遊遨天與蘆花作羽毛要識此來棲宿處上林瓊樹一枝高中主大悅手書浣紗谿詞賜之詞云菡萏香銷翠葉殘西風愁起碧波閑還與容光共憔悴不堪看細雨夢回雞塞遠小樓吹徹玉笙寒簌簌淚珠多少恨倚欄杆手捲珠簾上玉鉤依前春恨鎖重樓風裏落花誰是主思悠悠青鳥不傳雲外信丁香空結雨中愁回首綠波春色暮碧天流建州節度萬代餞別感化獻詩曰旌旆赴天臺谿山曉色開一家悲更喜送佛送

如來又題怪石一聯云草中誤認將軍虎山上曾爲道士羊感化少聰敏
未嘗執卷而多識故實詠諧捷急滑稽無窮會中主引李繼勳嚴績二相
遊苑中適見繫牛於樹上令感化賦詩應聲曰曾遭甯戚鞭敲角幾破田
單火燎身獨向殘陽曬枯草近來問喘更何人因以譏二相也又中主徒
豫章潯陽遇風中主不悅命酒獨酌指問北岸山舟人曰皖公山愈不悅
感化獨獻詩曰龍舟萬里駕長風漢武潯陽事正同珍重皖公山色好影
斜不落壽杯中中主大悅賜束帛後主卽位感化以中主二詞札上之後
主感動

馬令南唐書詩話類編楊
文公談苑堯山堂外紀

福建宦者傳

唐

吐突承璀字仁貞閩人以黃門直東宮爲掖廷局博士察察有才憲宗立擢累左監門將軍左神策護軍中尉左街功德使封簡國公王承宗叛承璀揣帝銳征討因請行帝見其果敢自喜謂可任卽詔承璀爲行營招討處置使以左右神策及河中河南浙西宣歙兵從之內寺伯宋惟澄曹進玉爲館驛使自河南陝河陽惟澄至之京華河中至太原進玉至之又詔內常侍劉國珍馬朝江分領易定幽滄等州糧料使於是諫官李鄘許孟容李元素李夷簡呂元膺穆質孟簡獨孤郁段平仲白居易等衆對延英謂古無中人位大帥恐爲四方笑帝乃更爲招討宣慰使爲御通化門慰其行承璀御衆無它遠畧爲盧從史侮狎踰年無功賴中詔撫使執從史而閒遣人說承宗上書待罪乃詔班師還爲中尉平仲劾承璀輕謀獎賦損國威不斬首無以謝天下帝不獲已罷爲軍器莊宅使尋拜左衛上將

軍知內侍省會劉希光納羽林大將軍孫瑋錢二十萬緡求方鎮有詔賜死跡絰承瓘故令出監淮南軍纖人太子通事舍人李涉投匭言承瓘等寃狀於是孔戣知匭事閱其副不受卽表其姦逐爲峽州司倉參軍然帝於承瓘殊厚會李絳在翰林苦論其過故決遣之帝後欲還承瓘爲罷絳宰相召爲內弓箭庫使復左神策中尉惠昭太子薨承瓘請立禮王不從常飾一室藏所賜詔勅地生毛二尺惡之躬糞除瘞之踰年帝崩穆宗銜前議殺之禁中敬宗時左神策中尉馬存亮論其寃詔許子士暉收葬宣宗時擢士暉右神策中尉是時諸道歲進閩兒號私白閩嶺最多後皆任事當時謂閩爲中官區藪咸通中杜宣猷爲觀察使每歲時遣吏致祭其先時號勅使墓戶宣猷卒用羣宦力徙宣歙觀察使

唐書宦者傳

楊復光閩縣人本喬氏有武力少養於內常侍楊玄价家頗以節誼自奮玄价奇之宣宗時玄价監鹽州軍誣殺刺史劉皐皐有威名者世訟其寃稍遷左神策軍中尉譖去宰相楊收權寵震時復光有謀畧累監諸鎮軍

乾符初佐平盧節度使曾元裕擊賊王仙芝敗之招討使宋威擊仙芝於
江西復光在軍請判官吳彥宏約賊降仙芝遣將尙君長自縛如縛威疾
其功密請僖宗誅之故仙芝怨復引兵叛後天子寤威階禍罷之以兵與
復光乃進禽徐唐莒王鐸爲招討復光仍監軍鐸之棄荆南也山南東道
節度使劉巨容定其地以忠武別將宋浩領荆南秦甯將段彥謨佐之復
光父嘗監忠武軍而浩已爲大將見復光少之不爲禮彥謨亦恥居浩下
有隙復光曰胡不殺之彥謨引慄士擊殺浩復光以客常滋假留後而奏
浩罪薦彥謨爲朗州刺史詔鄭紹業爲荆南節度使以復光監忠武軍屯
鄧州遏賊右衝帝西幸召紹業行在復光更引彥謨爲荆南節度使彥謨
給行邊詣復光以黃金數百兩爲謝其後忠武周岌受賊命嘗夜宴召復
光左右曰彼旣附賊必不利公不如毋行復光固往酒所語時事復光泣
曰丈夫所感獨恩與義耳彼不顧恩義規利害何丈夫哉公奮匹夫封侯
乃捐十八葉天子北面臣賊何恩義利害昧昧邪岌流涕曰吾力不足陽

合而陰離之故召公計因持杯盟曰有如酒卽遣子守亮斬賊使于傳舍
秦宗權據蔡州叛岌復光以忠武兵三千入見之宗權卽遣部將王淑持
兵萬人從復光定荆襄師次鄧淑逗遛復光斬之并其軍爲八以鹿晏弘
晉暉張造李師泰王建韓建等爲之將進攻南陽賊將朱溫何勤逆戰大
敗遂收鄧州追北藍橋會母喪班師俄起爲天下兵馬都監總諸軍與東
面招討使王重榮并力定關中朱溫守同州復光遣使鐫諭溫以所部降
方賊之彊重榮憂不知所出謂復光曰臣賊邪且負國拒戰邪則兵寡奈
何復光曰李克用與我世共患難其爲人奮不顧身比數召未卽至者由
太原道不通耳非忍禍者若諭上意彼宜必來重榮曰善白王鐸以詔使
至太原克用兵乃出京師平以功加開府儀同三司同華制置使封弘農
郡公賜號資忠輝武匡國平難功臣卒河中贈觀軍容使諡曰忠肅復光
御下有恩軍中聞其死皆慟哭而麾下多立功者諸子爲將帥數十人守
宗亦爲忠武節度使上

宋光嗣福州人爲人通敏有心計故爲宦者給事前蜀普寧公主公主爲
岐王從子繼崇妻不見答於夫而歸光嗣隨公主至成都王建留之不遣
以爲閣門南院使蜀天光中轉宣徽南院使建病草謂大將大臣多許昌
故人必不爲太子用思擇人而未得乃以光嗣爲樞密使與王宗弼等同
受顧命輔政子衍踐阼卽以光嗣判六軍諸衛事光嗣得柄用善希合後
主意衍頗寵任之由是與內給事王廷紹歐陽晃李用輅宋承渰田魯雋
等上下行私多所朋比國政遂日衰及唐兵來衍引兵至利州光嗣與王
宗弼言於衍曰東川山南兵力尙完陛下但以大軍扼利州唐人安敢懸
軍深入衍以爲然殊不爲意已而唐師日逼宗弼有異志棄利州西歸三
招討追及於白芳宗弼探詔示之曰光嗣令我殺爾曹遂合謀降唐未幾
宗弼稱我君臣久欲歸命而光嗣等熒惑幼主皆斬之函首送唐軍前光
嗣掌樞衡時凡斷國章多同兒戲判語畧用謔辭韻句其藐玩軍機皆此
類也時光嗣有從弟光葆者字季正隨光嗣爲閣給事黃門官宣徽北院

使累遷東川節度使先是唐使李嚴來聘光葆與語終日服其機辨料嚴東還必爲鄧艾之謀乃曰衍曰先皇承天正命惠養全蜀有鼎足之勢今察嚴辭氣竟以姦雄相喻是鄙我也請斬嚴以威天下衍不從既而光葆聞嚴還急於圖蜀復上疏請爲守備衍亦不能用國亡後託疾居閬州唐明宗時安重霸官閬州團練使光葆乃爲所殺

十國春秋

林延遇閩清人性險詐多計術少爲閩宦者南漢高祖以女清遠公主歸閩惠宗閩因道遣使延遇置邸於番禺專掌國信高祖賜以大第稟給甚豐嘗從容問以閩事延遇不對退謂人曰去閩語閩去越語越處人宮禁可如是乎或告於高祖高祖以爲賢用爲內常侍使鈎校諸司事聞惠宗被弒屢求歸國卒不許遂素服向其國哭三日乃止中宗嗣位加甘泉宮使大被倚任延遇亦恃其權寵與宦人盧瓊仙等表裏交爲殺戮中宗誅殺諸王盡出其謀高王洪邈在邕州鎮有誣其謀亂者遣延遇持醢往賜之死乾和十四年延遇病甚自知不起言於中宗曰臣死惟澄樞可

用中宗從之故澄樞得不次遷擢卒之日國人相與稱賀

南漢書南漢紀

蕭敬南平人正統初以長隨侍殿時英宗勞資近臣金鑑填集敬執簿算無差英宗察敬心計潛倚任之一日閱射命敬敬三發三中陞太監僉書監事奉使荆襄所過以清約聞憲宗朝用內官監督倉會計明允宿蠹搜剔殆盡孝宗朝入掌司禮公慎未嘗涉私燕閒賜問時有規諫孝宗大漸與閣臣劉健等同承顧命武宗卽位嬖劉瑾等八人時時內廷娛戲敬諫曰梓宮在殯鐘鼓之聲日外聞外謂天子何武宗不然也時外廷知上有所辟狎顧不知八人姓名他日劉健特進講敬書八人名使小豎持投之曰公胡不諫健講畢上內豎所投書上怒問主名健無以對八人者曰必蕭敬也因共譖之然卒不行楊一清爲相敬時以上命至閣中政事有失一清求敬附奏故時抗語侵敬敬不爲動世宗卽位年八十餘尙侍左右進止無所踰越年九十一卒敬遍觀典籍能詩好草書歷事六朝謙勤儉約如一日正德中見諸近侍田園第宅半京師輒歎曰豈吾輩福哉有姪

孫二人韶歆俱進士

閩書

張敏字輔德邑浯州人正統己巳沙寇起敏季父益彬集里人保障鄉里有與張世仇者誣益彬入奏之朝命逮其長者戍軍其幼丁率閹割之敏與其兄慶俱在閹割中送詣京師稍長得選入內庭敏雖幼言動舉止迥異常兒凡有謀爲出人意表憲宗在春宮英宗擇內臣爲近侍敏與焉敏於衆中恭慎無過遇事婉諫微言憲宗嗣位敏旦夕在左右夜具衣冠寢至子夜輒起以待有所見聞未嘗外洩凡外廷事一切不干涉用是忠謹之名溢於宮禁嘗奉命操練騰驤四衛官軍兼理十九房馬政監督五軍大營未幾賜璽書總督十二團營敏持嚴而能推心體下偏裨士卒莫不懷畏憲宗前後賞賜若書籍圖書蟒衣玉器金鞍之類不可勝數又於常廩外歲給米三十石特除其家戍軍籍五處召工爲猊喜神用玉璽識歲月敏兄弟三人同入禁掖俱見寵任兄本以御馬太監守備南京慶以司設太監鎮守浙江而諸子暉鴻臚寺卿苗太常寺卿一門緋綠輝映八閩

以來未有也先是憲宗蓋春秋高未子其時萬貴妃寵專後宮莫縣子也
上一日行遇紀淑妃淑妃有身矣慮萬貴妃妒不敢以聞第託曰病痞遂
得發居安樂堂既子且溺之敏聞之曰今萬歲未子卽不遽上聞何至棄
爲密令養之時時獻餅飴於紀淑妃哺饌皇子而當是時吳廢后在西宮
亦保持惟謹是爲孝宗皇帝至成化十一年孝宗皇帝生安樂堂六歲矣
憲宗尙未知敏時時密結萬貴妃太監段英乘間言之願未有會一日敏
在上傍爲上櫛上照鑑歎曰冉冉矣而未子敏伏地曰死罪萬歲有子也
上叱曰安得有敏伏地叩頭言狀上喜曰出示我孝宗胎髮未剪也召至
前髮披地走入上懷牽上衣遊戲將上髻憲宗顧示曰我子也遂出示羣
臣羣臣大喜於是上徙居紀淑妃永壽宮而孝宗得立皇太子成化乙巳
歲敏被疾上累遣太醫院官診視竟不起赴聞悼惜賜銀幣爲殯殮具遣
司設御馬二監治喪事復賜寶鈔二萬貫祭二壇戶部給齎糧麻布工部
造墳特賜冠帽牙牌玉帶殉葬孝宗卽位追賜敏璽書官其家人而苗累

官南京通政使列於八九卿矣其諸子亦至錦衣衛指揮同知管衛事而
暉亦以慶蔭官光祿寺少卿食三品俸賜敏瑩地通州三百畝守卒二十
人其後有錦衣千戶張鵬張臻百戶張宏恩澤之盛大璫所少而苗子定
登進士或云敏之死也萬貴妃恨之吞金而亡

閩書